

Pemuda sosial di dalam menubuhkan pertubuhan pemuda pemudi sosial menepuk dada dengan bangga : “Kalau fasal *sosial club* ini hendak dibawa kepada alim ulama atau mufti tentu sahaja dihitung mereka suatu perkara yang berdosa – kita akan berdosa – tetapi kita pemuda pemudi angkatan baharu hendaklah berani supaya dosa itu kita bawa untuk kebajikan bangsa kita” – maksudnya tentu tidak apa melakukan dosa atau mendapat buah daripada dosa itu kerana buahnya bagi sosial itu sudah kita sama-sama maklum....kita sama-sama tahu...selalu anak hampir keluar baharu nikah.

* * *

Kalau nikah mahu pergi sama kadi iaitu “kadi bahlul” dan kalau mahu buat kerja terlampau berani lalu menepuk dada yang mereka berani berterang-terang melanggar dosa, mereka berasa melanggar dosa itu kerana alim ulama yang menghakimkannya kerana orang ini telah menjadi seteru Allah atau adu Allah sebab imannya telah habis berani mencampak kekuasaan Allah di hadapan khalayak yang ramai dan orang dapat mengukur orang ini namanya sahaja beragama Islam.

* * *

Punca-punca sosial kelab pemuda pemudi itu berpendapat bahawa tujuan sosial kelab itu ialah merapatkan di antara orang kaya dengan orang miskin atau orang bangsawan dengan orang biasa dan “merapatkan orang atas dengan orang bawah”...inilah! Ingat-ingat jangan pakai rapat orang atas” orang bawah kerana sawah boleh jadi bukit, putus menjungkit – faham apa tidak. Kita faham memang yang dituju mahu kasi rapat orang atas, orang bawah – habis perkara.

* * *

Balik awat sudah habis, tetapi sungguhpun begitu di dalam perjumpaan menubuhkan “*social club*” baharu-baharu ini sedang rundingan diadakan dengan tidak semena-mena lampu dikatakan telah padam. Adakah ini sebagai contoh atau peringatan bahawa tujuan “*social club*” itu untuk bergelap-gelap?

* * *

Akhbar orang putih tidak putus-putusnya siarkan perkara-perkara keburukan Farouk – mereka itu seolah-olah menggambarkan bahawa ini sebagai contoh raja Islam tetapi mereka lupa bahawa yang mendidik Farouq itu ialah orang putih. Jadi kalau ia melakukan perbuatan yang tidak

baik itu maka janganlah dikatakan ia terdidik dengan didikan Islam tetapi ia diasuh oleh orang barat. Juga al-Mâlik Husayn Raja Jordan yang gambarnya berdancing itu pun hidupnya dididik di barat diasuh oleh orang barat semenjak dari kecil – tidak oleh orang Islam.

* * *

Perasaan itu lazimnya dapat dilihat daripada kelakuan dan perbuatan. Kalau orang itu berjiwa Islam maka yang dibesarkannya tidak lain daripada kemulian dan ketinggian Islam bahkan ia taksub dengan kerana taksub itu mulia juga pada setengah-setengah tempatnya. Demikian juga halnya kalau seseorang cenderung kepada semangat merah maka ia akan berkabung juga atas kematian itu dengan berwarna merah...ingat betulkah begitu?

* * *

Di dalam khutbah-kutbah Jumaat jabatan-jabatan agama sekarang dikatakan banyak “membanteras” tentang buku-buku lucah. Ini bagus! Tetapi kalau hanya habis dikhutbah sahaja tentulah tidak memberi kesan apa lagi kalau jabatan-jabatan itu hanya membanyakkan cakap daripada kerja. Ada seribu satu masalah lagi yang patut di buat tetapi tidak dibuat bahkan ada pula kerja-kerja sudah pun berkокok tetapi hingga sekarang belum juga lagi bertelur..

* * *

Sekarang timbul lagi satu majlis muzakarah di Pulau Pinang. Dahulu diadakan majlis muzakarah tidak jauh dari tempat itu iaitu di Seberang Perai dan 16 perkara telah dibahas di dalamnya dengan keputusannya sama-sama bersetuju kerana “mengikut kata guru saya.” Jadi yang dipakai guru saya kata -bukan Quran dan hadis kata dan sekarang muzakarah yang ada ini kita harap jangan pakai “guru saya kata”, tetapi Quran dan hadis ada sebut. Kalau berbalik kepada Quran dan hadis khilaf yang di belakang itu akan hilang kerana khalap itu terbitnya daripada Quran dan hadis.

* * *

Ada orang merengus kerana orang ada buat pekerjaan yang serupa dengannya. Kerana itu ia bilang atau syorkan supaya wartawan-wartawan kalau ada jual sharbat biar ramai-ramai jual sharbat – itu bagus. Sharbat awak tidak laku carilah jalan supaya laku. “Kalau lagi mahu laku” sendiri masuk bakul, sendiri angkat. Awak puji kawan awak, kawan awak puji awak dan bilang pada orang ramai pujaan orang ramai. Kalau sharbat macam ini sudah tentu mengikut sedap awak sendiri dan kalau orang ramai tak suka jangan awak marah – faham atau tidak!

- Cemeti al-Farouk



ke tengah yang menunaikan janji dan ikrarnya bahawa “hidup dan matinya semata-mata kerana Allah Subhānahu wa Taālā.”

* * *

Di dalam kita menunaikan puasa dengan menahan lapar dan dahaga itu pada masa itu kalau kita mahu boleh kita makan dan minum, kalau ada perasaan halus kita nescaya kita akan insaf bahawa didikan yang demikian itu ialah untuk membiasakan diri kita mengerjakan kebaikan mengorbankan barang-barang yang halal dan baik yang ada kepada kita bagi keperluan manusia yang lebih memustahakkannya – membiasakan kita taat menjalankan perintah Tuhan dan menghormati peraturan-peraturan agama.

Kalau ada perasaan yang lebih halus daripada itu pada masa kita menahan lapar dan dahaga tentulah kita akan ingat bagaimana sengsaranya nasib hidup saudara-saudara kita fakir miskin yang setiap hari menderita lapar dan dahaga bukannya kerana kehendaknya sendiri tetapi kerana terpaksa dan apa boleh buat. Perasaan halus yang timbul itu akan mendorong kita berbuat baik kepada sesama manusia terutamanya kepada yang lemah dan tidak berupaya. Inilah perkara-perkara yang selalu kita ingati dan insafi dalam kita berpuasa itu.

Rasulullah hidupnya pada permulaannya sebagai anak yatim dan miskin dan dengan keadaan yang demikian itulah menjadikan pengalamannya dan keadaannya itulah yang mendorongnya cinta dan kasih kepada anak-anak yatim dan orang miskin yang sengsara. Dengan itulah juga kita dilihat dengan ibadat puasa supaya ingat kepada mereka itu dan supaya timbul perasaan kepada kita yang akan menolong kesengsaraan umum yang menyuruh kita menjadi orang yang berbudi dan mulia.

Dalam surah al-Dhuha ayat 6 hingga akhir menyebut maksudnya : “Bukankah Allah mendapat engkau yatim lalu ia lindungi dan ia dapat engkau bingung lalu ia pimpin; dan ia dapat engkau miskin lalu ia beri kecukupan - sebab itu anak yatim janganlah engkau kasari, orang

miskin janganlah engkau keras, nikmat Tuhanmu hendaklah engkau dermakan.”

Keadaan di dalam berpuasa itu hendaklah di jalankan dengan sederhana dan jauh sekali daripada mengikut kehendak nafsu yang berlebih-lebihan – yang demikian ini lebih besar kesannya di dalam jiwa kita daripada pengetahuan yang berupa bayangan-bayangan jua. Buktinya boleh kita lihat dalam masa orang hidup nafsu nafsi, hidup mengutamakan faedah sendiri, yang kuat memakan yang lemah, yang besar menelan yang kecil – contohnya terang nyata di dalam dunia ini sehingga atau bom digunakan kerana meruntuhkan kekuasaan yang lain untuk keutamaan sendiri maka di dalam umat Islam dididik menunjukkan berkasih sayang, menunjukkan persaudaraan yang tidak dihalang oleh negeri dan benua menjadi batasnya. Di mana sahaja Islam menderita kerana perkuasaan samada penindasan penjajahan atau kekuasaan yang kuat maka dengan sendirinya saudara-saudara Islam yang lain serentak maju ke tengah membela dan membantu dengan sedia upayanya bahkan dipercayai kalau mereka itu mempunyai kekuatan yang nyata akan dihantarnya untuk membela saudara-saudaranya yang diperkosa dan cuba dibinasakan oleh musuh-musuh Islam itu.

* * *

Ingat kepada fakir miskin itu, salah satu daripada hikmah puasa bukan tujuan puasa – tujuan puasa yang sebenar ialah menyuruh kita berbakti, berbakti mengerjakan perintah Tuhan dan menjauhkan larangan-Nya. Selain daripada bakti-bakti yang biasa, bakti yang utama ialah mendorong kita menginggikan syiar dan kemulian Islam – berbakti kepada Allah supaya kita bertanggungjawab kepada masyarakat kita membangunkan kita daripada sentiasa dipijak, disakiti dan cuba akan dihapuskan daripada muka bumi ini daripada seteru-seteru Islam – suatu bakti yang menghendaki kita menegakkan syiar dan kemulian Islam, menunaikan jihad kita dengan harta dan nyawa kita untuk menegakkan agama Allah di bumi ini daripada agama itu di jajah oleh penjajahan

sehingga timbul yang badal dan tenggelam yang hak kerana kecuaian kita, kerana hidup kita di dalam ragu-ragu menunaikan perintah-perintah Tuhan, di dalam waham dan hampir-hampir tidak percaya bahawa Tuhan itu lebih berkuasa di dalam segala-galanya. Maka diharap di dalam puasa yang akan datang yang kita hadapi ini badan kita bersih daripada segala godaan-godaan yang memalingkan muka kita daripada mengadap Allah Subḥānāh wa Ta‘ālā; dan menghidupkan di dalam jiwa ulama-ulama kita yang mereka itulah penganjur-penganjur jihad yang akan menegakkan agama Allah di dalam negeri kita ini dan memadamkan di dalam hati mereka itu yang diri suatu masa ke suatu masa mereka itu dijadikan perkakas oleh penjajah, dan anasir-anasir yang cuba meruntuhkan agama kita. Ya Allah berilah taufik kepada mereka itu.

* * *

Kewajipan puasa itu mengandungi perintahan yang sama pada zahirnya menahan lapar dan dahaga, tetapi penerimaan anasnya ada bermacam-macam dan bertingkat-tingkat dan faedah yang dirasa oleh mereka itu pun begitu juga. Pandangan manusia itu terbahagi-bahagi kepada beberapa peringkat yang menerimanya – yang pertama ialah orang yang rendah pengetahuannya – mereka berpuasa sekadar menahan makan dan minum, lapar dan dahaga dan menahan diri daripada perkara-perkara yang membatalkan puasa – selain daripada itu tidak diperhatikan oleh mereka – golongan ini adalah golongan yang dinamakan puasa umum dengan dijalankan secara umum.

Golongan yang kedua, mereka yang berpuasa selain daripada menunaikan sebagaimana yang pertama mereka menahan seluruh anggotanya, lidahnya dan telinganya daripada melakukan perbuatan-perbuatan yang ditegah, mengumpat, melihat dan mendengar barang-barang yang ditegah. Puasa sedemikian ini dikatakan puasa khusus atau istimewa.

Golongan yang ketiga, ialah golongan yang tinggi. Mereka memelihara akal fikirannya daripada yang sia-sia. Menahan hatinya daripada gangguan was was dan yang mewahamkan – kerana itu mereka membanyakkan zikir mengingat Allah – sembahyang dan

sebagainya – tidak membuang masa dan membuat pekerjaan yang sia sia. Tingkat puasa yang tinggi ini dapat menahan hati daripada gangguan was was daripada syaitan, mendengar perkataan yang membawa bekas di dalam hatinya yang memecahkan fikiran yang bulat. Melemahkan maksud yang kuat, mengutarakan niat yang suci dan menjadikan hati yang berani menjadi penakut dan pengecut. Oleh sebab itu memelihara hati dan menjauhkan segala-galanya itu sangat mustahak supaya kebulatan dan keinginan tidak akan dapat dipecahkan oleh perasaan hasutan dan was was yang boleh merosakkan iman dan keinginan dan sebab itulah kaum muslimin disuruh berlindung daripada jenis-jenis yang demikian itu sebagaimana yang tersebut di dalam surat al-Nas yang maksudnya : “Katakanlah aku berlindung daripada Tuhan manusia. Raja manusia, Tuhan manusia dari kejahatan syaitan pembisik yang menunggu-nunggu peluang yang membisik-bisikan ke dalam dada-dada manusia dari jin dan manusia.”

Mudah mudahan di dalam puasa yang kita hadapi kelak dapat kita mengambil kesimpulan menjauhkan daripada was was dan waham. Menjauhkan daripada bisikkan syaitan yang durjana yang membisikkan di dalam dada kita. Di dalam dada ulama-ulama kita apa engkau pedulikan masyarakat kamu. Jikalah periuk nasi kamu sendiri, jikalah kesenangan kamu dan habiskanlah masa kamu dengan mentelaah kitab-kitab kamu, yang demikian itu lebih senang – biar masyarakat kamu jahanam asal periuk nasi kamu terjaga. Biarlah di dalam hati kamu tinggal sedaif-daif iman menegur-negur segala perkara-perkara itu dengan hati kamu – cukup memadai – jiwa yang demikian inilah kita berharap dan berdoa kepada Allah supaya terkikis di dalam hati mereka itu, supaya hilang di dalam hati mereka itu dan timbul kepadanya sesudah Ramadhan al-Mubarak nanti jiwa yang bertanggungjawab yang menginsafi ertiinya bagaimana agama yang telah dijajah dengan sepenuh-penuh maknanya dan sepenuh-penuh ertiinya itu. Sekali lagi kita berharap berilah topik kepada mereka itu dengan sepenuh-penuhnya amin.